

Que é Mar de Santiago?

O océano Atlántico na zona que abraza a desembocadura do río Ulla é o punto de inicio da tradición que recolle a primeira peregrinación a Santiago de Compostela. Desde Vilanova parte a máxica viaxe que nos leva polo Mar de Santiago, percorrendo os pasos da barca que trasladou os restos do Apóstolo a Galicia, ata chegar a Pontecesures. Esta ruta marítimo-fluvial pasa á súa vez por Valga e Catoira, terras de lenda, a través da súa gastronomía, a súa historia e a súa cultura.

O dramaturgo e escritor vilanovés Valle-Inclán, a famosa cantante A Bela Otero, de Valga, ou o primeiro arcebispo de Compostela e catoirense Diego Xelmírez serán os personaxes que nos acompañarán nesta aventura guiándonos nunha viaxe onde a gastronomía nos permitirá acercarnos aos mellores mexillóns de Galicia, ás augardentes máis tradicionais, ou ás tan afamadas anguías. Unha experiencia que nos fará revivir as invasións normandas, para roubaren os tesouros de Santiago, a través da Romaría Viquinga de Catoira, festa de Interese Turístico Internacional, ou somerxernos nas augas cristalinas da ría de Arousa nas praias das Sinas e O Terrón de Vilanova, ou na praia fluvial de Vilarello, en Valga.

O final do noso percorrido, Pontecesures, permitiranos ver de cerca a ponte de doce arcos da época romana (século I) reformada no século XII polo Mestre Mateo, xusto ao lado do embarcadiiro da localidade e lugar de captura da lamprea, o peixe milenario do Ulla. Na praza de abastos, a tan só uns metros do porto fluvial, poderemos descubrir este manxar e outros dos moitos tesouros gastronómicos de Galicia.

Segue o trazado dos 17 cruceiros de pedra que sinalizan o percorrido. Volve á orixe do Camiño e descobre o Mar de Santiago. Unha ruta para embeberse de historia e sentir o espírito dos primeiros peregrinos a Compostela, paso a paso, gota a gota.



Vilanova de Arousa

Pasarela á praia de O Terrón



Monumento a Valle-Inclán na Praza do Castro

O porto do Mar de Santiago

O dramaturgo e escritor Ramón del Valle-Inclán é o ilustre veciño que nos acompañará nunha máxica viaxe a esta vila mariñeira, das principais zonas de produción de mexillóns con selo DO Mexillón de Galicia. Zona costeira que acolle praias de augas tranquilas e area dourada coa ría de Arousa sempre no horizonte, dispón tamén dun patrimonio natural de excepción no que destaca o Monte Lobeira, que nos ofrece fantásticas vistas da zona, e restos históricos que fan de Vilanova unha parada imprescindible a fin de coñecer o Mar de Santiago.

Non te perdas

- Porto Mar de Santiago
- Praias O Terrón e As Sinas
- Casa Museo Valle-Inclán
- Miradoiro Monte Lobeira



Catoira

Torres do Oeste

A fortaleza de Compostela

O desembarco de piratas viquingos para roubaren os tesouros da Catedral de Santiago provoca que Diego Xelmírez, primeiro arcebispo de Compostela nacido en Catoira, mande construír no século XII un punto estratéxico militar: as Torres do Oeste. Fortaleza da cidade do Apóstolo nun momento no que comezan as primeiras peregrinacións, convértese en símbolo de defensa e esplendor dunha época na que Catoira escoltaba a ría de Arousa das expedicións escandinavas. Nun enclave natural inigualable, e fogar de numerosas especies autóctonas, esta localidade lévanos ás beiras do Ulla, á zona húmida de cores douradas e verdes que completan o espazo, e a paseos e vistas panorámicas dende os seus muíños de vento.

Non te perdas

- Torres do Oeste
- Muíños de vento
- Lagoa de Pedras Miúdas
- Romaría Viquinga (Festa de Interese Turístico Internacional)



Drakar no desembarco da Romaría Viquinga



Valga


Fervenzas de Parafita e Raxoi

O tesouro que garda o río Ulla

Os meandros do río que serpean no Val do Ulla delimitan a terra de Carolina Otero, máis coñecida como A Bela Otero, cantante, actriz e personaxe icónica da Belle Époque. Xoias naturais como as fervenzas e muíños de Parafita e Raxoi "con bañeiras naturais de auga doce", o bonito parque fluvial do núcleo urbano, e enclaves como a praia fluvial de Vilarello ou os muíños de dobre aspa do miradoiro de Beiro, fan deste concello un paraíso verde no corazón da provincia de Pontevedra. Terra de augardentes e anguías, Valga tamén é berce do historiador e investigador Xesús Ferro Couselo, autor ao que se lle dedicou o Día das Letras Galegas en 1996.

Non te perdas

- Fervenzas e muíños fluviais de Parafita e Raxoi
- Parque fluvial de Vilarello
- Lagoa Mina Mercedes
- Festa da Anguía e Mostra de Caña do País



Cruceiro na praia fluvial de Vilarello



Pontecesures

Ponte Romana



Barca para a captura da lamprea no porto fluvial

Onde se unen os Camiños

A ponte que une a provincia da Coruña e Pontevedra, de orixe romana, dálle nome a esta localidade. O río Ulla delimita unha das terras galegas nas que a lamprea é a protagonista culinaria indiscutible, froito dun labor de pesca artesanal con séculos de tradición e á que se lle dedica unha festa gastronómica. Miradoiros que nos deixan vistas panorámicas do fantástico val onde descansa Pontecesures, unha praza de abastos cos mellores produtos locais e numerosos vestixios patrimoniais da historia deste concello que nace no século I d. C., completan a proposta turística do destino onde a ruta marítimo-fluvial Mar de Santiago enlaza co Camiño Portugués.

Non te perdas

- Ponte romana
- Praza de Abastos e Casa da Lamprea
- Porto fluvial
- Festa da Lamprea

Camiño de Santiago

A ruta Mar de Santiago sitúase en Galicia, destino final de todos os Camiños, e máis concretamente no centro da Ría de Arousa, a máis famosa das rías galegas.

Partindo desde o porto de Vilanova de Arousa remontaremos parte da ría e o tramo final do río Ulla, percorrendo paisaxes de gran beleza e relevancia histórica nas localidades de Catoira e Valga ata chegar ao noso destino, o porto fluvial de Pontecesures.

Desde alí, a nosa ruta enlaza coa última etapa do Camiño Portugués, a só 25 quilómetros da meta: Santiago de Compostela.



Traslatio:

A ruta que deu orixe ao Camiño

O primeiro Camiño sucando o Mar de Santiago, o Camiño orixinal, devolveunos ao xerme do xubileo, a Traslatio, vivindo en primeira persoa as experiencias de Atanasio e Teodoro, discípulos do Apóstolo, para devolver o seu corpo a Galicia, a terra onde predicara.

Conta a lenda que, tras percorrer esta travesía marítimo-fluvial, os restos do Apóstolo foron enterrados no monte Liberum Donum, xusto o lugar no que séculos despois se levantou a Catedral de Santiago, destino de peregrinación dende a Idade Media ata os nosos días e meta final da ruta Mar de Santiago.



Concello de Vilanova



Concello de Catoira



Concello de Valga



Concello de Pontecesures



www.mardesantiago.com



Camiño á orixe

